



賴濱先生詩集傳卷第九

鹿鳴之什

小雅

小雅之所以爲小大雅之所以爲大何也小雅言政事之得失而大雅言道德之存亡政事雖大形也道德無小不可以形盡也蓋其所謂小者謂其可得而知量盡於所知而無餘也其所謂大者謂其不可得而知沛然其無涯者也故雖爵命諸侯征伐四國事之大者而在小雅行葦言燕兄弟耆老靈臺言麋鹿魚鼈蕩刺飲酒號呼韓奕歌韓侯取妻皆事之小者而在大雅夫政之得失利害止於其事而道德之存

亡所指雖小而其所及者大矣毛詩之叙曰雅者政也政有大小故有小雅焉有大雅焉以二雅爲皆政也而有小大之異蓋未之思歟

鹿鳴燕羣臣嘉賓也

呦呦鹿鳴食野之苹我有嘉賓鼓瑟吹笙吹笙鼓簧承筐是將人之好我示我周行

苹蘩蕭也筐篚屬所以行幣帛也周忠信也鹿食於野無所畏忌則悠然自得而鳴呦呦矣我有嘉賓而禮樂以燕之從容以盡其歡使其自得如鹿之食苹則夫思以忠信之道示我矣忠信者可以願得之而

不可強取也

呦呦鹿鳴食野之蒿我有嘉賓德音孔昭視民不怵君子是則是倣我有旨酒嘉賓式燕以敖

視觀也怵輕也敖遊也

呦呦鹿鳴食野之芩我有嘉賓鼓瑟鼓琴鼓瑟鼓琴和樂且湛我有旨酒以燕樂嘉賓之心

芩草也湛樂之久也

鹿鳴三章章八句

四牡勞使臣之來也

皇皇者華以遣使臣四牡以勞其來以事言之當先

趙彞先生詩集傳 卷九
遣後勞今先勞而後遣何也鹿鳴之三常施於禮樂
不獨用於勞遣故燕禮鄉飲酒歌焉意者以其聲爲
先後歟

四牡駢駢周道倭遲豈不懷歸王事靡盬我心傷悲
駢駢行不止也倭遲歷遠之貌也王事無不堅固者
是以不獲歸而傷悲也

四牡駢駢嘽嘽駘馬豈不懷歸王事靡盬不遑啓處
嘽嘽喘息也白馬黑鬣曰駘駘也處居也

翩翩者騅載飛載下集于苞栩王事靡盬不遑將父
騅夫不夫不祝鳩孝鳥也春秋傳曰祝鳩氏司徒也

謂其孝故爾是以孝子不獲養而稱焉騅之飛也
亦下而集於栩不若使者之久行不返不獲養父母
也將養也

翩翩者騅載飛載止集于苞杞王事靡盬不遑將母
杞枸櫞也

駕彼四駘載驟駘駘豈不懷歸是用作歌將母來詗
駘駘驟貌也詗告也使者未嘗不懷歸也故君爲作
此歌於其來而告之以其欲養父母之意獨言將母
因四章之文也

四牡五章章五句

皇皇者華君遣使臣也

皇皇者華於彼原隰駢駢征夫每懷靡及

皇皇煌煌也高平曰原下濕曰隰駢駢衆也煌煌之華生於原隰而不知原隰之異維其所在而無不煌煌者臣奉君命以出而每懷不及事之憂不忘咨訪不以遠近險易易其心亦如華之無不煌煌也

我馬維駒六轡如濡載馳載驅周爰咨諏

周忠信也爰於也訪問於善爲咨咨事爲諏

我馬維騏六轡如緜載馳載驅周爰咨謀

咨難爲謀

我馬維駟六轡沃若載馳載驅周爰咨度

咨禮爲度

我馬維駟六轡旣均載馳載驅周爰咨詢

陰白襍毛曰駟咨親爲詢

皇皇者華五章章四句

常棣燕兄弟也

春秋外傳曰周文公之詩也蓋傷管蔡之失道而作之以親兄弟

常棣之華鄂不韡韡凡今之人莫如兄弟

常棣棣也鄂其承華者也未有華盛於上而鄂不韡

韓者也兄弟之相為益亦猶是矣故曰凡今之人莫如兄弟以為小人好以親為怨而樂從其疏也故此詩每陳朋友之不足恃者以告之

死喪之威兄弟孔懷原隰哀矣兄弟求矣

兄弟之相懷不見於其平居而見於死喪之威今使人失其常居而聚於原隰之間則他人相舍而兄弟相求矣哀聚也

脊令在原兄弟急難每有良朋況也未歎

脊令雖渠也飛則鳴行則搖不能自舍人之急難相救不舍斯須如脊令者唯兄弟也雖有良朋其甚者

不過為之長歎息而已況甚也

兄弟闐于牆外禦其務每有良朋烝也無戎

閱狠也務當作侮烝塵也兄弟雖內闐而不廢禦外侮使朋友而相忿也其能久者無為戎以害已則善矣尚可望其禦侮哉

喪亂既平既安且寧雖有兄弟不如友生

人居平安之世不知兄弟之可恃而以至親相責望則兄弟常多過失易以生怨故有以朋友為賢於兄弟者夫觀人於平安則不能得其實其必試之於患難而後得之

饋爾籩豆飲酒之飫兄弟既具和樂且孺

饋陳也飫饜也孺屬也患世之疏遠其兄弟故教之陳其籩豆飲酒至飫使兄弟具來以觀其樂否苟樂也則其疏之者過矣

妻子好合如鼓瑟琴兄弟既翕和樂且湛

妻子以好合耳及其和也如鼓瑟琴況於兄弟之以天屬也哉特患不親之耳苟其親之其樂豈特妻子而已翕合也

宜爾室家樂爾妻帑是究是圖亶其然乎

帑子也究深也亶信也小人思慮不能及遠常以爲

兄弟之於我無所損益不知兄弟之相親亦所以宜其室家而樂其妻帑者患其淺陋而不信故使之深思而遠圖之以信其然否

常棣八章章四句

伐木燕朋友故舊也

伐木丁丁鳥鳴嚶嚶出自幽谷遷于喬木嚶其鳴矣求其友聲相彼鳥矣猶求友聲矧伊人矣不求友生神之聽之終和且平

丁丁伐木聲也嚶嚶兩鳥鳴也事之甚小而須友者伐木也物之無知而不忘其羣者鳥也鳥出於谷而

升於木以木爲安而不獨有也故嚶然而鳴以求其友況於事之大於伐木而人之有知也哉是以先王不遺朋友故舊以爲非特有人助也鬼神亦將祐之以和平矣

伐木許許醜酒有藇既有肥羜以速諸父寧適不來微我弗顧

許許柿貌也以筐曰醜以藪曰滑藇醜酒貌也羜未成羊也速召也伐木至小矣而猶須友故君子於其閒暇而酒食以燕樂之所以求其驩心也

於粲灑埽陳饋八簋既有肥牡以速諸舅寧適不來微

我有咎

粲鮮明也天子八簋

伐木于阪醜酒有衍籩豆有踐兄弟無遠民之失德乾餼以愆

愆多也民之失德也有以乾餼相譴謫故君子於其朋友故舊無所愛者

有酒滑我無酒醑我坎坎鼓我蹲蹲舞我迨我暇矣飲此滑矣

滑舊之也醑買也有則滑之無則醑之不以有無爲辭也奏之以鼓重之以舞盡其有以樂之也及我之

暇而飲我以滑道主人之厚也

伐木六章章六句

天保下報上也

人君以鹿鳴之五詩宴其羣臣天保者豈以答是五詩於其宴也皆用之歟其言皆臣下所以願其君然古禮廢矣不可得而知也

天保定爾亦孔之固俾爾單厚何福不除俾爾多益以莫不庶

保安也單盡也除開也天之安吾君亦甚固矣使之無不厚者是以無福不開予之使之多受增益是以

無物不蕃庶者

天保定爾俾爾戩穀罄無不宜受天百祿降爾遐福維日不足

戩福也穀祿也將使之安有福祿故開其心智使之無所不宜以能受之詩云宜民宜人受祿於天如是然後可以長有其福而日且不足矣此所謂何福不除也

天保定爾以莫不興如山如阜如岡如陵如川之方至以莫不增

興作也言萬物無不作而盛者此所謂以莫不庶也

吉蠲爲饋是用孝享禴祠烝嘗于公先王君曰卜爾萬壽無疆

吉善也蠲潔也饋酒食也春曰祠夏曰禴秋曰嘗冬曰蒸公先公也君先君也卜予也尸嘏主人之辭也蓋言非獨天助之先祖亦莫不予也

神之弔矣貽爾多福民之質矣日用飲食羣黎百姓徧爲爾德

神報之以福民無爲而飲食百官象之而爲其德言無有不順也弔至也質成也黎衆也百姓百官也

如月之恒如日之升如南山之壽不騫不崩如松柏之

茂無不爾或承

天地神人無有不順則其所以願之者如此恒常也騫虧也木落則無繼落而有承者惟松柏也

天保六章章六句

采薇遣戍役也

采薇出車杖杜此三詩皆言文王爲西伯以紂之命而伐玁狁故其詩曰自天子所謂我來矣天子謂紂也然此詩之作則非文王之世矣故其詩曰王命南仲往城于方王謂文王也文王未王而稱王後世之所追誦也而毛氏以王爲紂故叙以爲文王之世歌

此詩以遣勞之夫紂得命文王而不得命南仲故王
得爲文王而不得爲紂王不得爲紂則此詩非文王
之世之詩明矣

采薇采薇薇亦作止曰歸曰歸歲亦莫止靡室靡家玁狁之故不遑啓居玁狁之故

文王爲西伯以天子之命西伐昆夷北伐玁狁將遣
戍役而戒其期曰薇可采而行故於其行而督之曰
薇亦作矣可以行矣旣告之以其行又告之以其歸
曰歲莫而後反凡所以使民久役於外弃其室家而
不遑啓處者皆玁狁之故也

采薇采薇薇亦柔止曰歸曰歸心亦憂止憂心烈烈載
饑載渴我戍未定靡使歸聘

行者內憂歸期之遠而外爲饑渴之所困亦甚病矣
戍者未定則無以使之歸聘天子是以若是急也

采薇薇采薇薇亦剛止曰歸曰歸歲亦陽止王事靡盬不
遑啓處憂心孔疚我行不來

始言薇作次言薇柔終言薇剛言時日已晚不可復
留也歲之陽十月也不來不反也兵行故有不反之
憂

彼爾維何維常之華彼路斯何君子之車戎車旣駕四

牧業業豈敢定居一月三捷

爾華盛貌說文作爾常常棣也君子將帥也其車陳於道路如華之盛而其馬業業然壯也豈以是安於遠戍使汝不速反乎亦庶乎一月而三捷以求速歸耳

駕彼四牡四牡騤騤君子所依小人所腓四牡翼翼象弭魚服豈不日戒玁狁孔棘

騤騤強也腓辟也象弭以象骨飾弓末也魚服以魚獸之皮爲矢服也棘急也將帥之車非獨君子之所依亦小人之所恃以辟患難也且將帥之在軍畏慎

翼翼躬服弓矢相戒以玁狁甚急豈獨暇豫哉其勞苦憂患亦與士卒共之耳

昔我往矣楊柳依依今我來思雨雪霏霏行道遲遲載渴載饑我心傷悲莫知我哀

此章深言其往返之勤苦所以深慰之也

采薇六章章八句

出車勞還率也

我出我車于彼牧矣自天子所謂我來矣召彼僕夫謂之載矣王事多難維其棘矣

牧郊也其將北伐也出車於郊而告之曰有至自天

子所而使我出征者召僕夫而使之載王事多難不可緩也

我出我車于彼郊矣設此旒矣建彼旒矣彼旒旒斯胡不旒旒憂心悄悄僕夫況瘁

龜蛇曰旒鳥隼曰旒旒于旒也旒旒揚也況甚也君子勇於從事維恐旒旒之不旒旒與僕夫之甚瘁不如其志也

王命南仲往城于方出車彭彭旂旒央央天子命我城彼朔方赫赫南仲玁狁于襄

王謂文王也是時文王未王而稱王者後世之追稱也南仲文王之屬也方朔方也彭彭壯盛也交龍爲旂央央明盛也襄除也文王命南仲往城朔方曰天子以是命我今使南仲爲將以往庶乎玁狁之患於是而除有以報天子矣

昔我往矣黍稷方華今我來思雨雪載塗王事多難不遑啓居豈不懷歸畏此簡書

文王之伐玁狁也采薇而行采繁而歸今日黍稷方華則六月矣雨雪載塗則十月矣蓋旣城朔方六月而出兵十月而還止於朔方來年春而歸也簡書戒命也

嘒嘒草蟲趨趨阜螽未見君子憂心沖沖既見君子我心則降赫赫南仲薄伐西戎

草蟲鳴而阜螽躍婦人之念君子亦猶是矣方其未見也以不見為憂耳及其既見而後知喜其成功也故其終也則矜之曰赫赫南仲薄伐西戎然則既伐獫狁又伐西戎也

春日遲遲卉木萋萋倉庚喈喈采芣苢執訊獲醜薄言還歸赫赫南仲獫狁于夷
卉草也訊問也醜衆也夷平也

出車六章章八句

杖杜勞還役也

兵之出也有遣役而無遣率蓋為軍中之禮也軍中上下同事故遣役而遂遣率及其還也率役分勞蓋為國中之禮也國中貴賤異數故勞率而後勞役禮曰賜君子小人不同日此之謂也

有杖之杜有皖其實王事靡盬繼嗣我日

皖實貌也君子行役則婦人獨任其家事如特生之杜而負有皖之實言弱而不能勝也奈何王事日夜不已使君子久而不反乎

日月陽止女心傷止征夫遑止

遑暇也春而出征至於十月則歸期及矣而猶不至
故女心傷悲曰吾君子亦暇矣乎曷爲不時至哉
有杖之杜其葉萋萋王事靡盬我心傷悲卉木萋止女
心悲止征夫歸止陟彼北山言采其杞王事靡盬憂我
父母

山之草木非一也而獨采其杞則山嘗有餘矣今王
事靡盬非獨以病行者也又以憂其父母曾山木之
不若也

檀車鞞鞞四牡瘡瘡征夫不遠

檀車以檀爲車也鞞鞞敝貌也瘡瘡罷貌也

匪載匪來憂心孔疚期逝不至而多爲恤卜筮借二言
言近止征夫邇止

君子不載不來使我憂心甚病歸期逝矣而不時至
徒多爲相恤之言而已於是卜之筮之而同曰近矣
征夫邇矣言其家念之至也

杖杜四章章七句

魚麗美萬物盛多能備禮也

魚麗于罍鱮魚君子有酒旨且多

麗歷也罍曲梁也所謂寡婦之笱也鱮揚也魚鮓也
寡婦之笱而獲鱮魚施者小而得者大也古之仁人

交萬物有道取之有時用之有節則草木鳥獸蕃殖
無有求而不得君子於是及其閑暇而爲酒醴以燕
樂之其酒旣旨且多言無所不備也

魚麗于罍魴鱧君子有酒多且旨

鱧魴也

魚麗于罍鯉鯉君子有酒旨且有

鯉魴也

物其多矣維其嘉矣物其旨矣維其偕矣物其有矣維
其時矣

偕齊也多則患其不嘉旨則患其不齊有則患其不

時今多而能嘉旨而能齊有而能時言此全也

魚麗六章三章章四句三章章二句

頽濱先生詩集傳卷第九終

頽濱先生詩集傳卷第十

南陔之什

小雅

南陔孝子相戒以養也

白華孝子之潔白也

華黍時和歲豐宜黍稷也

此三詩皆亡其辭古者鄉飲酒燕禮皆用之孔子編詩蓋亦取焉歷戰國及秦亡之而獨存其義毛公傳詩附之鹿鳴之什遂改什首予以爲非古於是復爲南陔之什則小雅之什皆復孔子之舊南有嘉魚樂與賢也

南有嘉魚烝然罩罩君子有酒嘉賓式燕以樂

烝塵也罩罩也罩罩非一辭也魚之在水至深遠矣
然人未嘗以深遠爲辭而不求雖不可得猶久伺而
多罩之是以魚無有不得也苟君子之求賢心誠好
之而不倦如是人之於魚則亦豈有不可得者哉

南有嘉魚烝然汕汕君子有酒嘉賓式燕以衍

汕櫟也櫟撩畧也衍樂也

南有樛木甘瓠纍之君子有酒嘉賓式燕綏之

魚非有求於人而人則取之以爲賢者亦如是而吾
則強求之歟非也瓜蔓於地是豈可強使從人哉然

其遇樛木也未嘗不纍之而上物之相從物之性也
豈有賢者而不願從人者哉獨患不之求耳孔子曰
未之思也夫何遠之有

翩翩者騅烝然來思君子有酒嘉賓式燕又思

父子之相親物無不然者故擇木之鳥常懷其親來
而不去君子之事君如子之養父母義有不可已者
故曰長幼之節不可廢也君臣之義如之何其廢之
蓋孔子歷聘於諸侯老而不厭乃所謂烝然來思者
惟莫之用是以終舍而去古之君子於士之至也則
酒食以燕樂之故士可得而留也又復也思辭也既

燕矣而猶未厭安之也

南有嘉魚四章章四句

南山有臺樂得賢也

南山有臺北山有萊樂只君子邦家之基樂只君子萬壽無期

臺夫須也萊草也國之有賢人猶山之有草木以自覆蓋也君子之長育人才如山之長育草木多而不厭外則能為邦家之基內則身享壽考之報矣且非獨如此而已至於德音洽於衆聽餘慶及其後人亦未有不由此也故終篇歷言之

南山有桑北山有楊樂只君子邦家之光樂只君子萬壽無疆南山有杞北山有李樂只君子民之父母樂只君子德音不已南山有栲北山有杻樂只君子遐不眉壽樂只君子德音是茂

栲山樛也杻櫨也

南山有枸北山有榲樂只君子遐不黃耇樂只君子保艾爾後

枸枳枸也榲鼠梓也

南山有臺五章章六句

由庚萬物得由其道也

崇丘萬物得極其高大也

由儀萬物之生各得其宜也

三詩皆亡鄉飲酒燕禮亦用焉燕禮升歌鹿鳴下管新宮射禮諸侯以狸首為節新宮狸首皆正詩而詞義不見或者孔子刪之歟不然後世亡之也

蓼蕭澤及四海也

蓼彼蕭斯零露漙漙兮既見君子我心寫兮燕笑語兮是以有譽處兮

蓼長大貌也蕭蒿也譽豫通凡詩之譽皆言樂也諸侯來朝其衆且賤如蕭蒿然王者推恩以接之無所

不及如零露之於蕭然故其既見天子也莫不思盡其心之所有以告之天子又申之以燕禮於其燕也極其笑語之樂而無間諸侯是以樂處於是也

蓼彼蕭斯零露瀼瀼既見君子為龍為光其德不爽壽考不忘

瀼瀼多貌龍寵也

蓼彼蕭斯零露泥泥既見君子孔燕豈弟宜兄宜弟令德壽豈

泥泥濡貌兄弟同姓諸侯也

蓼彼蕭斯零露濃濃既見君子儻革沖沖和鸞雝雝萬

福攸同

倻轡也革轡首也冲冲垂貌也在軾曰和在衡曰鸞諸侯燕見天子天子必乘車迎之於其門故云

蓼蕭四章章六句

湛露天子燕諸侯也

湛湛露斯匪暘不晞厭厭夜飲不醉無歸

湛湛凝也晞乾也厭厭久也天子燕諸侯而飲之酒如露之凝於物無不濡足者飲酒至夜非醉而不出如露之得日而後乾也

湛湛露斯在彼豐草厭厭夜飲在宗載考

宗同姓也考成也古者族人侍飲于宗子不醉而出是不親也醉而不出是滌宗也天子之飲諸侯亦然故在同姓則成之異姓則辭之

湛湛露斯在彼杞棘顯允君子莫不令德

露之在草也如將不勝其在木也則能任之矣將言其無不醉故以豐草言之將言其醉而不能亂故以杞棘言之顯允君子莫不令德言醉而不亂也

其桐其椅其實離離豈弟君子莫不令儀

桐椅雖實繁而枝不披君子雖飲酒至夜將之以禮禮終而莫不令儀如桐椅之不爲實所困也

湛露四章章四句

彤弓之什

小雅

彤弓天子錫有功諸侯也

彤弓昭兮受言藏之我有嘉賓中心貺之鐘鼓既設一朝饗之

春秋傳曰諸侯敵王所愾而獻其功王於是乎賜之彤弓一彤矢百玃弓矢千以覺報燕凡諸侯賜弓矢然後專征伐彤弓朱弓也昭弛貌也大飲賓曰饗其賜之也行之以饗禮一朝饗之言并厚之以大禮也彤弓昭兮受言載之我有嘉賓中心喜之鐘鼓既設一

朝右之

載載以歸也右助也

彤弓昭兮受言囊之我有嘉賓中心好之鐘鼓既設一朝醕之

囊韜也醕報也

彤弓三章章六句

菁菁者莪樂育材也

菁菁者莪在彼中阿既見君子樂且有儀

菁菁盛貌也莪蘿蒿也阿大陵也君子之長育人材如阿之長莪菁菁然盛也

菁菁者莪在彼中沚既見君子我心則喜菁菁者莪在彼中陵既見君子錫我百朋

古者貨貝二貝爲朋百朋言其所以祿士之多也
汎汎楊舟載汎載浮既見君子我心則休

君子之於人無所不養譬如楊舟之於物浮沉無不載也二雅之正其詩之先後周之盛時蓋已定之矣仲尼無所升降也故儀禮之歌詩其次與今詩合小雅小述文武下及成王然其詩之次皆非其世之先後周公既定禮樂自鹿鳴至於杖杜九篇皆以施於燕勞以其事爲次故常棣雖周公閔管蔡之詩而列

於四非復以世爲先後也今將辯之則其言伐獫狁西戎者爲文王之詩其言天下治安爵命諸侯澤及四海者爲武成之詩其餘則有不可得而詳者矣且其言文王事紂之際猶有追稱王者然則武成之世所以追誦文王而非文王之世所自作也

菁菁者莪四章章四句

六月宣王北伐也

六月棲棲戎車旣飭四牡騤騤載是常服玁狁孔熾我是用急王于出征以匡王國

棲棲不安也常服韎韝也于曰也宣王承衰亂之後

獫狁內侵命尹吉甫伐之六月方暑而不遑安飾其車馬載其戎服而告其衆曰獫狁甚熾我是以急於出兵且又有王命不可緩也

比物四驪閑之維則維此六月既成我服我服既成于三十里王于出征以佐天子

周官祭祀朝覲會同毛馬而頒之軍事物馬而頒之毛齊其色也物齊其力也既比其物而又四驪言馬有餘也閑習也則法也馬既齊矣服既成矣則於是出征古者師行日三十里

四牡脩廣其大有顛薄伐獫狁以奏膚公有嚴有翼共

武之服共武之服以定王國

顛大貌也膚大也公功也嚴莊也翼敬也言將帥之德也服事也

獫狁匪茹整居焦獲侵鎬及方至于涇陽織文鳥章白旆央央元戎十乘以先啓行

匪茹非其所當入也整居言無憚也焦獲周之藪也郭璞曰扶風池陽瓠中是也鎬鎬京也方未詳涇陽涇之北也織文微織之文也鳥章革鳥之章也旆繼旒者也夏曰鉤車先正也商曰寅車先疾也周曰元戎先良也皆所以啓突敵陣之前行也

戎車旣安如輕如軒四牡旣佶旣佶且閑薄伐玁狁至
于太原文武吉甫萬邦爲憲

後視之如輕前視之如軒車之調也佶壯健也

吉甫燕喜旣多受祉來歸自鎬我行永久飲御諸友包
鼈膾鯉侯誰在矣張仲孝友

來歸自鎬歸其采邑也吉甫旣還燕其朋友而張仲
在焉張仲賢人也言其所與無非賢者侯維也

六月六章章八句

采芑宣王南征也

薄言采芑于彼新田于此蓄畝方叔涖止其車三千師

千之試方叔率止乘其四騏四騏翼翼路車有奭篚芾
魚服鉤膺雉章

芑菜也田一歲曰苗二歲曰新三歲曰畚涖臨也師

衆也千杆也奭赤貌也金路赤飾鉤膺樊纓也將采

芑者於何取之其必於新田蓄畝而後得之方其治

田也則勞而及其采芑也則佚故宣王之南征則亦

使方叔治其軍而後用之方叔之治軍也陳其車馬

而試其衆以杆敵之法又親以身率之士之從之者

皆知愛之是以美其車馬之飾而無厭也其車三千

爲二十二萬五千人以荆蠻強盛不得不爾耶

薄言采芑于彼新田于此中鄉方叔涖止其車三千旂
旒央央方叔率止約軼錯衡八鸞瑤瑤服其命服朱芾
斯皇有瑒葱珩

中鄉民居在焉故其田允治軼長轂也約之以革錯
衡文衡也三命赤芾葱珩

馱彼飛隼其飛戾天亦集爰止方叔涖止其車三千師
干之試方叔率止鉦人伐鼓陳師鞠旅顯允方叔伐鼓
淵淵振旅闐闐

戾至也爰於也鉦所以止鼓所以進也鞠告也淵淵
闐闐鼓聲也振旅治兵之終也隼之飛而至天甚迅

疾矣然必集於其所當止而後可用言士雖勇而不
教則不知戰之節亦不可用也故方叔命其鉦人擊
鼓以誓之士之聞其鼓聲者無不服其明信也意者
方叔之南征先治其兵既衆且治而蠻荆遂服故詩
人詳其治兵而略其出兵首章之車非卽戎之車二
章之服非卽戎之服三章之陳師未戰而振旅至於
卒章而後言其遇敵故三章皆治兵也

蠢爾蠻荆大邦爲讐方叔元老克壯其猶方叔率止執
訊獲醜戎車嘽嘽嘽嘽焯焯如霆如雷顯允方叔征伐
獫狁蠻荆來威

猶謀也嗶嗶衆也焯焯盛也方叔則嘗征伐玁狁而克之矣況於蠻荆安有不來服而畏之者乎

采芑四章章十二句

車攻宣王復古也

我車旣攻我馬旣同四牡龐龐駕言徂東

攻堅也同齊也宗廟齊毫戎事齊力田獵齊足所謂同也龐龐克實也東東都也宣王內脩政事車旣堅馬旣齊則往東都田獵以治兵焉

田車旣好四牡孔阜東有甫草駕言行狩

甫大也田者大刈草以爲防所謂甫草也

之子于苗選徒囂囂建旄設旒搏獸于敖

苗狩皆田之通名也敖鄭山也

駕彼四牡四牡奕奕赤芾金鳥會同有繹

於是諸侯來朝王因與之出田赤芾金鳥諸侯之服也金黃朱色也繹陳也

決拾旣飲弓矢旣調射夫旣同助我舉柴

決鉤弦也拾遂也飲手指比也調強弱等也言射事脩備也射夫旣同言無不善射也柴或作桴積也言諸侯亦助之舉積禽也

四黃旣駕兩驂不猗

猗倚也言御者之良也

不失其馳舍矢如破

言射者之良也不善射者爲之詭遇則獲不然則不能使御者不失其馳而舍矢如破然後爲善射也

蕭蕭馬鳴悠悠旆旌徒御不驚大庖不盈

兵之出徒聞其馬鳴蕭蕭徒見其旆旌悠悠言不譁也不驚驚也不盈盈也驚猶警戒也

之子于征有聞無聲允矣君子展也大成

允信也展誠也我必聲之然後人聞之我則不聲而人則聞之必其實有餘也故曰信哉其君子矣誠哉

其大成矣

車攻八章章四句

吉日美宣王田也

吉日維戊旣伯旣禱田車旣好四牡孔阜升彼大阜從其羣醜

伯馬祖天駟也古者將用馬力則禱於其祖從從禽也醜類也

吉日庚午旣差我馬獸之所同鹿鹿麇麇漆沮之從天子之所

差擇也外事用剛日故禱以戊擇以庚同聚也鹿牡

曰鹿麋麋多也漆沮在渭北所謂洛水也自言其上
驅獸而至天子之所也

瞻彼中原其祁孔有儻儻俟俟或羣或友悉率左右以
燕天子

言禽獸之多且擾也祁大也趨則儻儻行則俟俟三
為羣二為友率馴也燕樂也

既張我弓既挾我矢發彼小豨殪此大兕以御賓客且
以酌醴

壹發而死曰殪燕而酌醴所以厚賓也

吉日四章章六句

鴻鴈美宣王也

鴻鴈于飛肅肅其羽之子于征劬勞于野爰及矜人哀
此鰥寡

鴻鴈背陰向陽如民之去危從安厲王之後民人離
散譬如鴻鴈之飛四方無所不往徒聞其羽聲肅肅
未知所止也及宣王遣使勞來安集之雖鰥寡無不
寧息矜人人之可憐者也

鴻鴈于飛集于中澤之子于垣百堵皆作雖則劬勞其
究安宅

使者所至招來流民使其都邑築其墻垣而安處

之然後民知所止如鴻鴈之集于澤也故其民雖勞而不怨曰其終將安宅矣

鴻鴈于飛哀鳴嗒嗒維此哲人謂我劬勞維彼愚人謂我宣驕

民復其故居勞而未定如鴻鴈之嗒嗒也與廢補敗不能自靖不知者以爲宣驕耳

鴻鴈三章章六句

庭燎美宣王也

宣王不忘夙興而問夜之早晚足以爲無過矣非所當譏也毛氏猶謂雞人不脩其官故叙曰因以箴之

過矣

夜如何其夜未央庭燎之光君子至止鸞聲將將

央久也庭燎大燭也宣王將視朝不安於寢而問夜之蚤晚曰夜如何矣則對曰夜未央庭燎光朝者至而聞其鸞聲矣

夜如何其夜未艾庭燎晰晰君子至止鸞聲噦噦

艾將盡也晰晰明也噦噦徐也

夜如何其夜鄉晨庭燎有輝君子至止言觀其旂

夜聞其鸞聲而已晨則見其旂矣至此然後可以視

朝

庭燎三章章五句

汙水規宣王也

汙彼流水朝宗于海歟彼飛隼載飛載止嗟我兄弟邦人諸友莫肯念亂誰無父母

汙水流滿也水流猶有所朝宗而隼飛猶有所止諸侯獨奈何肆行不顧曾無所畏忌哉故告於兄弟之國與其友邦之君子爾莫肯念救吾亂人豈有無父母而能生者哉君臣之不可廢猶父子之不可去也汙彼流水其流湯湯歟彼飛隼載飛載揚念彼不蹟載起載行心之憂矣不可弭忘

●湯湯無所入也飛揚無所止也不蹟不循道也弭止也

歟彼飛隼率彼中陵民之訛言寧莫之懲我友敬矣讒言其興

厲王之亂而諸侯恣行不可禁止宣王將復繩之而君子懼其不以漸治久亂而不以漸治亂之激也故告之曰隼舍其飛而循中陵斯以畏矣民猶將爲訛言以誣之不可不懲也今諸侯亦欲敬矣特畏讒言之興是以不至至而有讒恐不能自免耳

汙水三章二章章八句一章章六句

鶴鳴誨宣王也

鶴鳴于九臯聲聞于野魚潛在淵或在于渚樂彼之園爰有樹檀其下維穉它山之石可以爲錯

臯澤也穉落也爰曰也鶴鳴于深澤而聲聞於野魚潛于淵而時出於渚言物無隱而不見也人之樂於園者謂其上有檀而下有穉言大者之無所不容也它山之石以爲無用矣猶可以爲錯而攻玉言世未有無用之物也求賢者亦猶是耳

鶴鳴于九臯聲聞于天魚在于渚或潛在淵樂彼之園爰有樹檀其下維穀它山之石可以攻玉

穀楮也

鶴鳴二章章九句

賴濱先生詩集傳卷第十終



